

Midzë F3 a F10. Kaszarabica

Jedną razą ùsnał jem. Nie wiem, czë to mrëczenië kòmputra, czë szemarzenië deszczu za òknã to sprawiło, dosc tëli, że mie zmògło.

Pierszé przëszlë głosë. – Halanah! Halanah! Rozezdrzòł jem sã nawkòł i pòstrzòd lëdzci ùrzmë półklëczący, półležący na drodze a zybiący sã na òtmianë wprzòdk i w tił – dozdrzòł jem kòlegã z robòtë Rómka bin Drzëzdza z zawitã biòłą flagã na głowie. Nié le òn tak dzywno bël òbùti. Jak le òkã sygnac chłopi mielë czòrny brodë a głowiska turbanoma scësnióé. Białci leno òczama swiécëłë, bò òkróm gòłëch stopów a pasyka cała wëzi nosów, wszëtkò miałë ruchnama zakrëté. Rómk bël jész do pòznaniò, bò brodã miòł rzòdzëchnã pòdług jinëch brodo-chłopów. Całi wejrowsczy deptòk òd bùdinkù zusu, co tam terò jałmùznã wëdòwelë, przez szaturã z karã Remùsa ibn Lëpińszcë Pùstczy, pò Szasëjã Kaszëbszczégò Dżihadu – abòwòł pòdług melodie, co niesła sã nade Wejrowã – Dëchòwą Stolëcã Kaszëb a pòdług nowi nomenklaturë – Kaszëbską Bëkkã.

– Niech mdze pòchwòlony prorok nasz, Adbùlah!

– A niewiérnëch niech zeżgrzã bùcze! – òdpòwiedzòł jem na zawòłanië nieznónégò mie chłopa, co prowadzył swòje sztëré białci do ritualnégò pedikuru.

Zazwònia kòmórka. Mòja Trzecò chca mie kùpic nowã dżelabã do ùrzãdu a zandałë ùplotłë bez méstra z barónich flaków. W ruchnowim krómie „Nadzi grifùlk” zarò krótkò pòzdòwczì trzëpùklatëch camélów, białk bëło skòpicã. Pòstrzòd sta równo òbloklëch niastów òd razu pòznòł jem mòjã Hagnessã, pò òczach mòdri kròsë a ji milëcznym zawòłanim: – Tuwò jem, gãsy pãpkù!

Rëgnãlë jesmë prosto do składu, co znóny bël w òkòlim ze swòji zòchãcbë w Radio Kaszëbùl: *Nawetk kątór a żaba kùpiq kòl nas dżelabã!*

Wisalë. Dłudzë, krotszë. Dlò ùmiartëch, co z nich miesãdzowé pòstë lëftë spùszczìwalë. Dlò taczëch jak jò, co jich lzi przeskòczëc jak òbińsc. Różny farwë a namienieniò. Czerwónë na leznosc kamieniowaniò cëzołòzniców, co sã z nié-Kaszëboma zadòwają a scynaniò tãpima topórkama tëch, co zle pò kaszëbskù gòdają. Żòłtë z czòrnyma grifoma na przëjachùnk Wiòldzégò Kalifa Pòlsczi. Bestro-bruné – na żòłãdkòwë niedołożnoscë. Biòłë – leno na zetkania z pétro-bracynama z Krótczégò Wschòdu. (Òdkãdka kòl Klëkòwi Hëtë òdkrëlë szëfrowi gaz, Saùdijskò Arabiò stała sã przëdnym jimpòrtërà kaszëbsczy tobaczi).

- Ta bãdze pasowa – szmëgna w mòjã starnã Trzecò i kòza mie sã òdzòc w rozëwã jak mòłpiã rzëckã dżelabã. Rësza do stojiszca z białogłowsczima czadoroma. Prawie mùezyna Francjatollah zachãcył z wieżë w Chwaszczënie do drëdzégò mòdleniò...

Bùten, jak colemało òb wieczòrk, bël sąd. Kaszëbszcë religiowé prawò kòzało pòlitików, co manią i nie zjiscywają swòjëch òbiécënków – rzeszac jãzëkoma do jãzëków swòjëch bótów i gòniec wkòł parlameńtu. Prawie nëkòł jeden, co przërzeknął Kaszëboma zelony

òstrów, górã złota, czë jakòs tak. Spùrgnął sã na jãzëkù kómpla z òpòzycje i pòdł jak dzëk przede dwiërzama. Lëdze zajãczelë. Za mało bëło widzawiszcza. To nie bëło to, co zawczora, czëj skrobëlë lëzkoma ministra òd emeriturów abò miesãdz temù, jak òbsãdzywelë białkã za pòlenie cygaretów. Kò pòlëc mòzna, ale nie z czarczafã na gãbie! Ùwãdzëlò sã bez to pól haremù szejka Barnima z El Sopòtów...

Doma jimra, jak wstec. Pierszò zrëchtowała prawie pòzëwnã zupã z baraniégò lëpa z pùlkama a sledzã. Drëgò kòlibała naszã szóstã córeczkã, spiëwiacë ji stòrã chòrankã „Bizahah, zuzkòjkòj, Hanuszulkò”. Trzecò przezëra sã w zdrzadle swòjémù nowémù, skrzãco-lilewémù czadorowi. Kapioszczì a gazetã pòdała mie Czwiòrtò a Piãtò leno zdała, cobë mie ùmëc a spac ùbiżkac.

Dzes midzë gazetã a mëcym naròz dzes z bòkù zawëło radio, jakbë wstapił w nie jaczi dzin. Dwignął jem głowã nad laptop a na ekranie òbòczył jem nôprzòdkã òdbicé rédzi „F” na mòji blësy. Dokładno òd „F3” do „F10”. Tej na stronie mòji parafie ùkòzãlë sã wiadła na niedzielã, dze grëbim drëkã stojało napisónë: **Zgòdno z bédënkã Òjca Swiãtégò naszò parafiò téz weznie do se biédnëch lëdzy, co to przed wòjnã za greńcã ùcëkajã. Wësokò Parafijalnò Kòmisëjò cygnãła kawle w ti sprawie. Z redosçã ògłosziwómë, że czestnosc ùgòszczeniò przez rok dzesãcòsobòwi familie Mòhameda zez Syrie mò... Tòmk Fòpka!!!**